

## Wolof - Jigéen Mbind - Wives Scriptures

Efes 5:22-24 Naka yéen jigéen ñi, nangeen nangul seeni jékkér, ni su doon Boroom bi. 23 Ndaxte góor mooy kilifag jabaram, ni Kirist nekke kilifag mbooloom ñi gém, muy jémmam ji muy sàmm. 24 Ni mbooloo mi nag jiitale Kirist, noonu la jigéen ji war a jiitale jékkéram ci lépp.

Efes 5:31,33 Mbind mi nee na: «Moo tax góor dina beru ndeyam ak baayam, di taq ci jabaram, ñoom ñaar doon benn.» 5:33 Waaye li teew, na góor gu nekk bëgg jabaram, ni mu bëgge boppam, te jigéen ji weg jékkéram.

1 Korent 7:3-5 Jékkér war na def warugaru jékkér ci jabaram; jabar it def warugaru jabar ci jékkéram. 4 Jigéen ji amul sañ-sañ ci yaramam moom kenn; jékkéram moo ko moom. Niki noonu it jékkér ji amul sañ-sañ ci yaramam; jabaram moo ko moom. 5 Bu kenn tere boppam moroomam, su dul ne dangeen a mànkoo ci def noonu ab diir, ngir gën a man a wéet ak Yàlla ciy ñaan. Waaye su loolu weesoo, nangeen doxal yoonu séy; lu ko moy, Seytaane dina leen fiir ndax seen ñàkk maandute.

1 Korent 7:34 te noonu dafay daldi bare soxla. Te jigéen ju séyul, walla janq, dafay bàyyi xel ci mbiri Boroom bi — bëgg koo jox yaramam ak xelam. Waaye jigéen ji séy dafay bàyyi xel ci mbiri àddina, ak nu mu man a neexe jékkéram.

Kolos 3:18 Jigéen ñi, na ku nekk nangul jékkéram, ndaxte looloo jekk ci ñi bokk ci Boroom bi.

1 Timote 2:11-15 Te it na jigéen jàng cig noppi, ànd ak déggal gu mat. 12 Mayuma jigéen, muy jàngale mbaa muy jiite góor, waaye na noppi. 13 Ndaxte Aadama la Yàlla jékk a sàkk, door caa teg Awa. 14 Te it du Aadama la Seytaane nax, waaye jigéen ja la nax, ba mu jàdd. 15 Teewul jigéen dina muc ci wasin, su saxee ci ngém ak mbëggeel, di ku sell te maandu.

Njàlbéen ga 3:16 Yàlla teg ca ne jigéen ja: «Dinnaa taral sa metitu mat, ci metit ngay wasin. Sa bëgg-bëggu bakkan dina la xiir ci sa jékkér, te moo lay teg tànk.»

1 Piyeer 3:1-6 Yéen itam jigéen ñi, na ku nekk nangul sa jékkér. Noonu su amee góor gu gémul kàddug Yàlla, te gis jabaram di dund dund gu sell, boole ci weg ko, loolu dina ko gindi ci lu àndul ak wax. 3 Bu seen taar aju ci col, maanaam ay létt, wurus mbaa yére yu rafet, 4 waaye nay taar bu sax bu nekk ci biir, di xol bu nooy te dal, ndax loolu lu takku la fa Yàlla. 5 Ndaxte jigéeni démb yu sell, ya gëmoon Yàlla, loolu moo doon seen taar; nanguloon nañu seen jékkér, 6 ni Saarata déggale woon Ibraayma, ba daan ko wooye «Sang bi.» Yéen nag, su ngeen dee def lu baax te bañ cee boole genn njàqare, kon mel na ni Saarataa leen jaboote.

Tit 2:1-5 Yaw nag nangay waare li dëppook njàngale mu wér mi. 2:2 Maanaa, na góor ñu mag ñi foog, am faayda te maandu, di ñu wér ci seen ngém, seen mbëggeel ak seen muñ. 2:3 Jigéen ñu mag ñi itam, na seen doxalin ànd ak faayda; buñuy jëw mbaa xér ci sangara. Waaye nañuy jàngale lu baax, 2:4 bay

sol ci boppu jeeg yu ndaw yi, ñu bëgg seeni jëkkér ak seeni doom, 2:5 di ñu maandu, sell te fonk seen kér, ñu neex deret te déggal seeni jëkkér, ngir kenn bañ cee gakkal kàddug Yàlla.

1 Korent 11:5-7,10 Waaye bu jigéen musóoruwl, buy ñaan walla buy wax ci kàddug Yàlla, kooku day suufeel jëkkéram jiy kilifaam, ndaxte day mel ni jigéen ju ñu wat. 6 Jigéen ju dul musóoru, bu yaboo, mu watu. Waaye su fekkee ne jigéen dafay am kersa, su wàññee kawaram walla mu watu, fàww kon mu musóoru. 7 Góor nag moom warul a teg dara ci boppam, ndaxte mooy melokaanu Yàlla te dafay wone ndamu Yàlla. Jigéen moom dafay wone ndamu góor. 10 Looloo tax jigéen war a teg ci kaw boppam luy màndargaal kilifteef ga, ndax malaaka yi.

Kàddu yu Xelu 12:4 Jeeg bu jàmbaare day teral jëkkér ja, jeeg buy rusloo day semmal jëkkér ja.

Kàddu yu Xelu 14:1 Jigéen, rafet xel, dimbali waa këram, su deeb dof, tas këram.

Kàddu yu Xelu 19:13 Doom ju dof naqaru baay baa, te jabar ju pànk mooy senn bu dakkul.

Kàddu yu Xelu 21:9,19 Dékkeb ruq cim sàq moo gën jabar ju pànk. 19 Dékke ndànd-foy-foy moo gën jabar ju tàng, bare ay.

Kàddu yu Xelu 25:24 Dékkeb ruq cim sàq moo gën jabar ju pànk.

Kàddu yu Xelu 27:15,16 Jabar ju pànk mooy senn bu dakkul, cib taw; 16 ku ko mana yemale, mana téye ngelaw mbaa nga ñëb ag diw.

Kàddu yu Xelu 31:10-31 Jeeg bu jàmbaare, ndaw lu jafe, ba rawati gànjar! 11 Jëkkér ja da koy wóolu, te jëkkér ja day am xéewal, du ko ñàkk. 12 Day defal jëkkéram lu baax, du ko lor, tey ànd ak bakkan. 13 Day wut kawari gàtt ak i wëñ, di ca liggéeye mbégte. 14 Day mel ni gaalu jula, di jëli dundam fu sore. 15 Day jóg te bët setul, di waajal njëlu njabootam, ak a sas ay janqam. 16 Day seetlu ab tool, jënd ko, sàkk ciw ñaqam, jëmbat tóokér. 17 Day gañu di góorgóorlu, ak a dëgëral pérëg ya. 18 Day gis njartel liggéeyam, te làmpam du fey guddi. 19 Ma ngay yor poqe ak këccu, di ècc. 20 Day jox ku ñàkk, di sàkkal néew-ji-doole. 21 Tiitul ci njaboot gi sedd bu metti, ndax ñoom ñépp ay tegley yére. 22 Mooy sàkkal boppam ay malaan, ay yéreem mucc ayib te yànj. 23 Dees na ràññee jëkkéram ca pénc ma, fa muy toog ca magi réew ma. 24 Ndaw su ni mel day ràbb i yére, di jaay, ak i gañaay, di jox jaaykat yi. 25 Faaydaak jom la làmboo, te èllëg ubul boppam. 26 Day wax lu xelu, di digle ngor. 27 Jigéen jooju mooy bàyyi xel ci njabootam, te du nangoo yàccaaral. 28 Doom ya dañu ko naan: «Jarawlakk!» jëkkér ja di ko gérëm naan: 29 «Jeeg bu jàmbaare bare na, waaye yaw, yaa ci raw.» 30 Melokaan wu jekk day naxe, taar day wéy, waaye jigéen ju ragal Aji Sax ji, kookkoo jara gérëm. 31 Joxleen ko njukkalu ñaqam, jëfam di woyam ca pénc ma.